

Festival di Dande dedica na Legendario Vicente Ras

Compositor, cantante conservador di nos Dande y Tambu

STA. CRUZ -- Diasabra

awor e Festival di Dande y musica Tipico di nos isla ta dedica na e legendario Vicente Ras, e conservador di nos dande di antaño y nos tambu.

Awendia Vicente ta conoci como e cantante y tocador di tambu, fundador di grupo di tambu Katashi na 1977 y cu a represent Aruba na Cuba na Festival del fuego na 1991 cu nos Dande, Cosecha y Dera

Gay.

Na 1999 Vicente a funda e grupo di tambu Sodo y Cuero cu ta masha popular riba nos isla y algun siman pasa a representa Aruba tambe pa di dos biaha na Curaçao durante e intercambio cultural Curaçao, Aruba, Bonaire, Venezuela y Trinidad y dos biaha tambe Sodo y Cuero a representa Aruba na Bonaire durante “Dia di Bonaire”.

Vicente ta Sali for di un familia musical cu ta bay atras den aña te den prome decadanan di siglo 19 cu Wimpy (Willem Severius Geerman) Maduro tabata canta dande.

Den historia di dande di Drs. Celia Thiel, esaki ta bin bon la dilanti cu e relato familiar y bruhamiento den faam di antes etc.

Despues di Wimpy a sigui Goy Krozendijk como e cantante grandi di dande y tambe Simon “Buchi Mon” Krozendijk, subrino di Wimpy.

A sigui despues cu Goy Ras, tata di Vicente y despues Vicente mes a bira cantante di dande y tocador di tambu.

Vicente a nace na September 1930, yiu di Gregorio “Goy Ras” y Paulina Ras Krozendijk. Na principio di decada 50 el’a compaña cu Teresita Tromp y for di e relacion aki a nace 5 yiu y mey mey di decada 60 el’a cada cu Marina Angela y di e matrimonio aki a nace 5 yiu.

MUSICO Y COMOSITOR

Ademas di ta un tocador di tambu, cantador di Dande di tambu, compositor di canticanan pa tambu, el’a funda y toca den varios agrupacion musical.

Na 1947 Vicente a funda hunto cu Prisciliano (Prens) Maduro y Jacobo “Coby” Maduro, Conhunto Superior.

E tabata cantante, tocador di maraca y tamborero.

Vicente tabata canta cancionnan di Sonora

Matancera, Bienvenido Granda, Daniel Santos y Kiko Mendive.

Conhunto Superior tabata to a ademas, wals, bolero, guaracha, rumba, guaguanco, son, son montuno, merengue y calypso.

Nan a toca en tur club di Aruba cu tabata existi e tempo ey, te cu 1952.

Despues Vicente a forma parti di Happy hit, y e tabata tin tambe un orquesta mixto cu hende homber y hende muher. E dos cantantenan femenino tabata Mercelina Werleman y Chana Stamper. E cantantenan masculino tabata Coby Maduro y su persona.

Na 1956 Vicente a funda Los Bigotes cu Simon “Chomon” v.d. Biezen cu sonfonia di man, Luis Maduro cu tabata toca raspa, Jose Stamper riba marimba, y Matew Maduro riba wiri y nan tabata toca merengue, musica colombiano, wals, tumba y danza. Coby Maduro a tuma

Los Bigotes over na 1957 y el’a haci e agrupacion mas grandi cu dos trompet y un baho cu a bin acerca.

Vicente no a retira. El’a sigui dedica su mes na musica tipico, dande, tambu y compone su cancionnan, te cu na 1997 el’a funda e grupo di tambu Katashi, menciona anteriormente.

Su grupo actual, Sodo y Cuero ta masha popular riba nos isla y pa masha hopi actividad musical den clubnan, centronan di bario, celebracionnan nacional, y for di tempo di Katashi, cu a pasa pa Sodo y cuero, Vicente ta toca regularmente pa turistanan den Bon Bini Festival.

Si tira un bista atras riba e familia y antepasadonan di Vicente por ripara cu tin seis generacion di dande y tambu. E deseo grandi Vicente semper tabata tin y tin ta pa no cambia e Dande di tambu y principalmente na Brazil, Rooi Master, Cura Cabay y San Nicolas, dande nunca a caba.